

**AGENDRE TRINITATIS 30 AGUSTUS 2020****1. FANGOWAI BA FOGAONI**

*(Tedöni dorosi , möi ndra sohalöwö bakha ba gosali, ba lahalö wangahono dödö banua niha Keriso ba wangondrasi ba ba wasumangeta khö Lowalangi).*

**Fangowai** :

**SA** : Ya'ami banua Zo'aya, Ya somuso tödö ba sowuawua tödö ami ba we'amöi föna Keriso ma'ökhö andre. Ma'owai Ami fefu, : Ya'ahowu.

**SATO** : Ya'ahowu !

**SA** : Ya faofao khömi Lowalangi...

**SATO** : Ya fao Khöu Geheha-Nia

**Fogaoni** :

**SA** : Da ta'owuawua'ö dödöda wangondrasi Yehowa, da ta'omusoi'ö dödöda ba wamalua fasumangeta khö Lowalangi. Tasuno Ia, manunö ita moroi ba Mbuku Zinunö **numero 27**

**27. YEHOWA WA' ABÖLÖGU 1**

Lala : Yehowa Wa' abölögu

do = f 4/4

MM = 88 - 92

1. Yehowa wa' abölögu, me Lowalangi Ia.

No Ihonogö dödögu, ba lumö danga-Ni-a.

Ha Ya' ia nisunogu götö wa' anau nosogu. Haleluya khö-Ni-a.

2. Yehowa wa' abölögu, me umbu wa' omasi.

Ibe' e khögu Zangefa, Yesu si möi salahi.

Da' ö zomuso dödögu, fa' ebua dödö-Nia, usuno Lowalangi.

**2. FANGA'ARO'Ö WA'OWULO (VOTUM)**

**SA** : Da tahonogö dödöda ba wariawösa, ba ba wa hasambua khö Lowalangi, (Muzizio zato):

No owulo ita ba da'e ba döi Lowalangi Ama, ba ba döi nono-Nia Yesu Keriso, ba ba döi Geheha Ni'amoni'ö. Fangorifida ha ba döi Yehowa si no momböi banua si yawa awö danö.....

**SATO** : YADUHU

**SA** : Ba u'ila Zo'aya, si dadao ba dadaoma sebua, si no alawa: anönö gosali ahe mbaru-Nia, önö gafi zamösana. Dua mbalubalu mbawa ba dua mbalubalu gahe ba dua ba Wehombo. Ba faoma lamane-mane we'ao khö nawöra: Ni'amoni'ö, Ni'amoni'ö, Ni'amoni'ö Yehowa ngahönö andrö; no anönö lakhömi-Nia guli danö ma'asagörö. HALELUYA.....

**SA** : **Manunö** : BZ. : 452

**Haleluya..... Haleluya..... Haleluya.....**

**SA** : Mangandrö ita :

He Yehowa Lowalangi Ama, Ono ba Eheha Ni'amoni'ö. Möiga mangalulu ba wangandrö saohagölö me no Örorogö, Ö'orifi, ba Öbohouniga fa'omasi-Mö andrö. Ma'andrö khö-U, tohugö wa'ebua dödö-U khöma, rorogöga ba ngawalö de'ala, efa'öga ba wanandraigö, rara dödö bangawalö gabula dödö, tundreheni faböi alau ndra'aga. Fatöröga ba zomasi Ndra'ugö irugi gamozua, fa makhamö nahia ba zi so Ya'ugö. Si lö mo'aetufa nisuna ba nifolakhömi Ndra'ugö, awö Zo,aya ya,aga Yesu Keriso ba Eheha Ni'amoni'ö, Yaduhu. **(Mudadao zato)**

**3. MANUNÖ moroi ba Mbuku Zinunö Numero 298****298. HE YESU HAGAINI DÖDÖGU 1**

do = a 4/4

MM = 96 – 104

1. He Yesu, hagaini dödögu, wangoroma' ö horögu.  
Fa lö utörö gelungua, ba wangerogö siduhu.  
Tödögu ya mufatörö, Eheha Ni ' amoni ' ö.
2. He Yesu, bè khögu wemöna, ba wolaŵa fefu udu.  
Me no onekhe zangalani, hulö sibai zi fahuwu.  
Susugi zi mörö tödö, fangelama na arörö.

#### 4. FOMBASO TAROMA LI LOWALANGI FAMÖRÖGÖ (AF)

: Da tafondrondrongo daroma Li Lowalangi, tehalö moroi ba zura **Sinunö 91:1-11**

1. Sonahia barö mba'aba'a andrö khö Wondrege zalawa andrö, da'ö zahono ba lumö Wondrege zabölö andrö.
2. Umane khö Yehowa: "Sawatögu ndra'ugö ba hatigu, Lowalangigu, tötöna fögu!"
3. I'efa'ö ndra'ugö ba dandrawa andrö khö zolau tandrawa wofu, ba i'orifi'ö ba wökhö waba famunu andrö.
4. Ibalugö ndra'ugö afinia, ba barö gafinia andrö auri ndra'ugö; no ba'aba'a ba baluse zi duhu andrö khönia.
5. Lö tola ata'u ndra'ugö gameta'uö andrö ba zi bongi, ba he ono wana sanörö, na ma'ökhö.
6. Fökhö waba andrö, sanörö sogömigömi, teu mbanua andrö, famakiko na laluo.
7. He hönö zi mate ba ngaimö, ba he fulu ngahönö zi mate ba gambölöu, ba ya'ugö, ba lö göna.
8. Ha höröu zangila, ba anehe'ö wamasulö andrö ba zolau si lö sökhi.
9. Me no öwa'ö: "Ya'ugö sa'ae dötönafögu, Yehowa;" Fondrege zalawa andrö no öbe'e sawatöu.
10. Lö itörö ndra'ugö sabu dödöu, ba lö ihatö'ö ia ba noseu famakao.
11. Iwa'ö ba mala'ika andrö khönia, ba khömö andrö, ena'ö larorogö ndra'ugö, ba lalamö andrö fefu.

Simanö daroma Li Lowalangi, da tatema'ö faoma sinunö: BZ.Numero 20:1

#### BZ. No: 20. MISUNOSUNO ZO'AYA

1. Misunosuno Zo 'aya, mi bè zumange-Nia.  
Mi 'ebua 'ö döi-Nia, sotöi banua-Nia.  
Me no Ikaoni göi ami, afu mitemawa'au ri, khö Yesu, Sangorifi.

#### 5. FANGANDRÖ FANGEFA HORÖ

SA

: Ya'ami ira talifusö'

Na tawa'ö lö horöda, ba talimo ita, ba siduhu lö'ö ba dödöda. Na ta'ombakha'ö Horöda, ba lö faröi Ia, ba no satulö Ia,fa'i'efa'ö khöda horö andrö, ihaogö ita, awö wa'iheta fefu zilö atulö. Andrö da möi ita föna Lowalangi si fao fangidengide'ö ba wangombakha horöda, (muzizio ita fefu)

#### Mangandrö ita :

He Yehowa Lowalangi, si lö ambö fa'abölö, ba si no fahöna fa'omasi. Mafaduhu'ö wa tenga sinangea ndra'aga tanö föna-Mö, me no fahöna horöma si no mafalua i'otarai iraono ndra'aga, he ba wehedema, era'era dödöma, awö gamuatama si lö faudu ba daroma Li-Mö. Andrö möiga khö-U ba wangandrö fa'ahakhö dödö-U, ena'ö Ö'efa'ö khöma horöma andrö si no mafalua, irege sohahau tödö ndra'aga wanohugö fekolima ba zi so fönama si faudu ba zomasi

Ndra'ugö. Hakhösi dödö-U khöma Ama, ba be'e aefa khöma horöma andrö ma'afefu, Yaduhu.

**SATO** : Manunö : BZ. Numero 224 : 1

## 224. NA'UBINI'Ö HORÖGU KHÖ YESU

1. Na'ibini'ö horögu khö Yesu, ba lö usöndra za hono dödögu U'ombakha'ö ngawalö horögu, mo lala dödö.

**SA** : **Turia Wangefa horö** : "Utayaigö golalöwamö, si mane lawuo, awö horöu, si mane sau. Tema fuli'ö khö-Gu, me no U'orifi ndra'ugö. LAKHÖMI KHÖ LOWALANGI SI YAWA.....

**SATO** : Manunö:

## 450. BA FA'ATULÖ BA GULIDANÖ

1. Ba fa'a tulö ba gulidanö ba niha ni'omasi 'ö andrö  
(mudadao zato)

### 6. FOMBASO TAROMA LI LOWALANGI FÖNA HUHÜO (AB)

: Da tafondrongo daroma Li Lowalangi, tehalö moroi ba zura **Halöwö Zinenge 19:13-20**

13. Ba latandraigö göi samofanö bekhu, niha Yehuda, sanörönöröi tanö, ösa, wanötöi töi Yesu, So'aya, ba zi so bekhu si lö sokhi, lamane: Uföfanö ami, ba döi Yesu, ni'ombakha'ö Waulo andrö.
14. Dafitu ira, ono gere sebua ba niha Yehuda sotöi Sikoia, zolau da'ö.
15. Ba itema lira bekhu si lö sökhi andrö, imane khöra: Aboto sa ba dödögu Yesu, ba u'ila Waulo andrö, ba ya'ami, ba ha niha ami?
16. Ba isawa ira niha andrö, si so bekhu si lö sökhi andrö, ilawa ira, darua, ibago, irege moloi ira, laröi nomo andrö; no aheta nukha ba no mesokho ira.
17. Ba terongo da'ö ba niha Yehuda sato ba ba Ndrawa Heleni, banua Nefeso, ba ihawui ira fefu fa'ata'u, ba tesuno sibai döi Yesu, So'aya.
18. Ba ato zi möi, si no mamati, ba wamokai buabuara; la'ombakha'ö.
19. Ba ato zi no molau fayafaya mangowuloi sura andrö ba latunu, ba zanehe zato, ba la'ofaya mbölinia, ba lasöndra, dua wulu a lima ngahönö ba rufia.
20. Ba ba wa'abölö Zo'aya andrö, ba monönönönö daroma li, ba abölö.

Ya'ahowu zamondrongo taroma li Lowalangi ba same'e ba dödö.

**SA+SATO** : Yaduhu

### 8. FASÖMBATA

**SA** : Iada'e tebe'e khöda ginötö ba wolohe fasömbata khö Lowalangi. Ta'osamuzaigö wame'e, he fasömbata si föföna, ba simanö göi zi mendrua awö zi medölu, sifao fangowuloi fasömbata sanandrösa ba Komisi Diakonia. Ba si föföna ua da tafondrongo Li Lowalangi me imane:

- ❖ Same'e sumange fangandrö saohagölö, da'ö zamolakhömi Ya'odo, ba zi lö sinegu ba mbuabuania U'oroma'ö wangorifi andrö khö Lowalangi. (Sinunö 50:23)

**SA** :

"Da tafasao wasömbatada andre föna Lowalangi, Manunö ita moroi ba Mbuku Zinunö numero 261

## 261. YA'E ZUMANGE <sup>1</sup>

*Ira'alawe*□

1. Ya'e zumange fasömbata, ma' ohe sumange Yehowa.

**Iramatua***Reff*

- Ma'andrö khö-U fahowu'ö zumange ni 'ohema khö-Mö
2. Ya'e zumange fasömbata mabe'e soroi ba dödöma.  
*Reff* : Ma'andrö khö-U ....
  3. Ya'e zumange fasömbata buala si'otarai Nama.  
*Reff* : Ma'andrö khö-U ....
  4. Ya'e zumange fasömbata, boto, noso, ba fa'aurima  
*Reff* : Ma'andrö khö-U ....
  5. Ya'e zumange fasömbata, lö irugi zomasi dödö-U.  
*Reff* : Ma'andrö khö-U ....
  6. Ya'e zumange fasömbata, ma'aohasi gölö Zo'aya.  
*Reff* : Ma'andrö khö-U ....

**9. KOOR/VOKAL GROUP**

- SA** : Da tafaogö dödöda ba wanuno Lowalangi faoma sinunö ni'olohesi:  
Koor ba Vokal Group
- a. Koor Jemaat
  - b. Vokal Grup Komisi Remaja
  - c. Kegiatan Wilaya III
  - d. Kor kom.Perempuan
  - e. Vokal Grup Kom.Pemuda
  - f. Vokal Grup Kom. Bapak.
  - g. ....

**10. MANUNÖ**

- SA** : Da tafa'anö dödöda wamondrondrongo taroma Li Lowalangi, manunö ita moroi  
Ba Mbuku Zinunö **numero 163**

**163. UHONOGÖ SIBAI DÖDÖGU**

1. Uhonogö sibai dödögu ba wamondrondrongo li Mö Yesu  
Mangalulu ndra'odo föna-U ba gametahö-Mö ia da 'a  
Öbayoini Eheha-U Yesu dozigö mbanua samati khö-U.  
Ubokai dödögu khö-U Yesu nahia daroma li-U.  
Taroma li-Mö lö fa'atebulö menewi ma 'ökhö ba si 'ogötö'ö lö sa mamalö.  
Taroma li-Mö si möi fangabölö utema 'ö soroi ba dödö, tolo ba wolo'ö.

**11. HUHUAO SEBUA**

- SH** : Ya'irorogö dödömi, awö gera'erami fa'ohahau dödö andrö, khö Lowalangi,  
Sabölö moroi ba gera'era niha fefu, ba khö Keriso Yesu. Mangandrö  
ita.....Yaduhu.
- a. Fombaso taroma Li Lowalangi V Moze 18:9-14 (**Tuho Migu : Möna Moroi  
ba Wa'abölö Zogömigömi/Menang atas Kuasa Kegelapan**)
  - b. Fanuriaigö
  - c. Nitanö ba dödö. ( V Moze 18:13 )
  - d. Fangandrö Fanga'aro'ö huhuo

- SATO** : Manunö : BZ. Numero 154 : 1

**154. NO MAFONDRONDRONGO LIU**<sup>2</sup>

1. No mafondrondrongo li-U, Lowalangi So 'aya.  
Tanö ba dödöma ia, fa böi olifuga.  
Fahowu 'ö ia khöma, ena 'ö ohahau dödöma fefu.  
Heta ba dödö zi lö sökhi, ma'o 'ö niwa 'ö-U.

**12. TUHO WAMATI**

- SA** : Me notarongo daroma Li Lowalangi, ba da tafaogö Lida wamaduhu'ö famatida Ya'ita niha Keriso föna Lowalangi, muzizio ita fefu.....endronga lida
- SA+SATO** : ❖ Ya'ö mamati khö Lowalangi Ama si lö ambö fa'abölö, somböi banua si yawa awö danö.  
 ❖ Ya'ö mamati Khö Yesu Keriso, So'aya ya'ita, Ono Lowalangi si ha samösa, nitema nina-Nia Maria khö Geheha Ni'amoni'ö, Ono nono alawe Ia, no manaögö huku Ia, barö mbawa Fondrio Filato, teforöfa Ia, mate,ba lako'o. No möi Ia ba mbanua niha tou, no maoso Ia moroi ba ngai zimate me no irugi tölu ngaluo. No manahae Ia, möi ba zorugo, dumadao ba gambölö Lowalangi Ama si lö ambö fa'abölö. I'otarai da'ö mangawuli Ia dania ba wanguhuku niha sauri, awö zi no mate.  
 ❖ Ya'ö mamati khö Geheha Ni'amoni'ö, ba ufati ha sambua mbanua ni'amoni'ö, fefu niha Keriso, fa'awösa niha ni'amoni'ö, ba fangefa horö, ba femaoso mboto zimate, ba fa'auri si lö aetu. Yaduhu. (Mudadao zato)

### 13. ANGOMBAKHATA BA MBANUA NIHA KERISO

- SA** : Da tafondrondrongo gangombakhata:.....

#### MANUNÖ

- SA** : Manunö ita moroi ba Mbuku Zinunö **numero: 327**

#### **327. HUMEDE KHÖDA ZO' AYA**

Lala : Haleluya Khö Yehowa ( No. 1 )

do = f 4/4

MM = 96 - 104

1. Humede khöda Zo' aya, Iforoma ' ö zala.  
Me omasi Ia ita, na mangesa dödöda.  
Tödöda si tohöna da ' ö zi möi fangala.
2. Ya so wangesa dödöda, ba ngawalö horöda.  
Me sahakhö tödö Ia, Ibè khöda wangepa.  
Tafonaha Geheha, samatörö ya' ita.

### 14. FANGANDRÖ SALAHI + FAMATENGE + HOWUHOWU

- SH** : Muzizio ita fefu, mangandrö ita :.....(tetohugö) : Ba döi Zo'aya ya'aga Yesu Keriso, Si no mamahaö ya'aga ba wangandrö mamane :

- SH + SATO** : He Ama khöma siso ba zorugo, ya te'amoni'ö döi-U. Ya tobali banua-U fefu niha, Ya itörö zomasi ndra'ugö, hulö ba zorugo, ya si manö göi ba gulidanö. Öma sirugi ma'ökhö be'e khöma ma'ökhö andre. Ba efa'ö khöma horöma, si mane fangefa'öma sala ba zi so sala khöma. Böi ohe ndra'aga ba wanandraigö, efa'öga ba zi lö sökhi. Me ya'ugö zamatörö banua-U, ba sokhö fa'abölö, awö lakhömi, irugi zi lö aetu. Yaduhu

- SH** : **FAMATENGE + HOWUHOWU :**  
 Mi'angawuli si fao fa'ohahau dödö, ya tobali ami sura Keriso, samaduhu'ö Ya'ia ba Lala wa'aurimi sero ma'ökhö, ba mitema (tatema) howuhowu Lowalangi :  
 ❖ Ya mufahowu'ö ami/ita Lowalangi, Ya murorogö ami/ita  
 ❖ Ya mufohaga mbawa-Nia Khömi/khöda, Ya mu'ebua'ö dödö-Nia khömi/khöda  
 ❖ Ya mufalemba hörö-Nia khömi/khöda, Ya mube'e wa ohahau dödö khömi/khöda fefu. Yaduhu

- SATO** : Manunö BZ.Numero **328. YA'ITA NIHA KERISO 1**

- SH** : Ya'ahowu

- SATO** : YA'AHOWU